



DIDIK ANAK MENABUNG

Muniroh Hamat

Wang adalah salah satu perkara penting dalam kehidupan manusia sejak dari dahulu. Pengurusan wang yang berkesan menjadi asas dalam kelangsungan hidup, tambahan lagi ketika berhadapan dengan isu dan wabak global yang melanda pada masa kini. Salah satu perancangan kewangan yang berkesan ialah dengan amalan menabung. Amalan menabung senang dilakukan tetapi perlu konsisten dalam mengaplikasikannya dengan mengikuti panduan yang tepat.

Menabung adalah salah satu aspek penting untuk membina asas kewangan yang kukuh, namun masih ramai antara kita yang tidak mengambil berat kepentingan menabung ini. Mendidik dan mengajar anak-anak menabung bukan sahaja dapat mengajar mereka kaedah untuk menyimpan wang, malah secara tidak langsung dapat mengenali wang ringgit dari usia muda. Kesedaran untuk menabung haruslah dilakukan ketika anak-anak masih kecil lagi, kerana ketika usia di awal sekitar 6 hingga 7 tahun, kanak-kanak lebih mudah dan cepat belajar serta mudah menyerap apa yang berlaku di sekelilingnya. Dan sebagai ibu dan bapa, kita seharusnya mendidik dan menggalakkan anak-anak belajar menguruskan perbelanjaan dari kecil agar mereka tidak membesar menjadi seorang yang boros dan tidak tahu menghargai wang. Tabiat kewangan yang baik seharusnya dipupuk oleh ibu bapa itu sendiri dengan menjadi role model terhebat di mata anak-anak.

Beberapa tips dikongsikan untuk mendidik si kecil menabung:

1. *Hadiahkan tabung yang menarik*

Terdapat pelbagai bentuk tabung di pasaran. Hadiahkan tabung yang boleh menarik minat anak-anak seperti watak animasi kegemaran mereka.

2. *Tetapkan sasaran simpanan*

Didik mereka untuk menyimpan duit sekiranya mereka ingin membeli sesuatu. Dengan cara ini, mereka lebih menghargai barangan yang dibeli kerana menggunakan wang simpanan mereka.

3. *Jadikan diri anda mentor pada anak-anak anda*

Anak kecil selalu mengikuti perbuatan orang tua mereka. Jadi anda boleh menjadi contoh pada mereka. Tunjukkan yang anda juga ada tabiat suka menabung. Letakkan tabung anda bersebelahan mereka. Apabila mereka nampak anda memasukkan duit dalam tabung, sekaligus timbul keinginan untuk melakukan perkara yang sama.

4. *Berikan ganjaran kecil*

Sesekali berikan ganjaran daripada usaha mereka dalam meningkatkan tabungan. Contohnya belanja aiskrim kesukaan mereka, belikan buku atau memasak masakan kegemaran mereka.

5. *Buka akaun simpanan*

Kebanyakan bank menawarkan akaun Junior bagi kanak-kanak bawah 12 tahun. Hadiah percuma juga ditawarkan untuk tujuan promosi apabila membuka akaun. Anak-anak akan lebih bersemangat apabila mereka melihat sendiri buku bank dicatat dengan nama mereka sendiri dan jumlah wang yang telah disimpan.

Kesimpulannya, apa-apa pun semuanya bermula dengan anda. Sebagai ibu bapa, kita tidak boleh mengharapkan anak kita menjadi seorang yang bertanggungjawab dalam pengurusan kewangan apatah lagi kita mengamalkan gaya hidup yang boros. Oleh itu, janganlah menjadi seperti ketam mengajar anaknya berjalan lurus.

Selamat menabung...

